

UREDBA O NAKNADAMA KOJE NEMAJU KARAKTER PLAĆE*

(“Službene novine Federacije BiH”, br. 63/10, 22/11, 66/11, 51/12, 99/22, 15/23 i 68/23)

I-OPĆE ODREDBE

Član 1.

Ovom uredbom uređuju se uvjeti, kriteriji i način ostvarivanja naknada i drugih materijalnih prava koja pripadaju rukovodećim i ostalim državnim službenicima i namještenicima u federalnim organima uprave i federalnim upravnim organizacijama i drugim tijelima federalne uprave (u daljnjem tekstu: federalni organ uprave), kao i drugim pravnim licima u kojima se kao osnivač pojavljuje Vlada Federacije Bosne i Hercegovine ili ima većinsko vlasništvo ili osnivačka prava vrši Parlament Federacije Bosne i Hercegovine, a koja nemaju karakter plaće (*izmjena 68/23*).

II - NAKNADE KOJE PRIPADAJU DRŽAVNIM SLUŽBENICIMA I NAMJEŠTENICIMA

1. Naknada za prijevoz na posao i sa posla

Član 2.

Državnom službeniku i namješteniku kome nije organiziran prijevoz na posao i sa posla, a čije je mjesto stanovanja udaljeno od mjesta rada, najmanje dva kilometra pripada naknada ili mjesečna karta za troškove prijevoza u visini mjesečne karte gradskog, prigradskog, odnosno, međugradskog saobraćaja.

Pravo na naknadu troškova prijevoza u međugradskom saobraćaju imaju oni državni službenici i namještenici koji dolaze na posao iz mjesta prebivališta koje se nalazi van područja u kome je mjesto sjedišta federalnih organa uprave.

Pravo na naknadu troškova prijevoza, u ovom slučaju ostvaruje se na osnovu pismenog zahtjeva državnog službenika, odnosno namještenika u kojem se navodi adresa stvarnog stanovanja u mjestu rada i da svakodnevno putuje od tog mjesta do mjesta rada. Uz zahtjev se prilaže pismeni dokaz firme čiji se prijevoz koristi za dolazak na posao i povratak sa posla (dnevna ili mjesečna karta).

Ova naknada odobrava se rješenjem koje donosi rukovodilac federalnog organa uprave. Zloupotreba korištenja naknade iz st. 1. i 2. ovog člana, smatra se materijalnom štetom i podliježe obavezi odgovornosti za tu štetu u skladu sa zakonom.

Član 3.

Državni službenik i namještenik koji za potrebe prijevoza dolaska na posao i povratka sa posla, uz prethodno pismeno odobrenje rukovodioca federalnog organa uprave koristi privatni automobil u tom slučaju pripada mu naknada u visini cijene mjesečne karte u javnom saobraćaju (*izmjena 51/12*).

2. Naknada za odvojeni život od porodice i smještaj u mjestu rada

Član 4.

(1) Rukovodeći državni službenik čije je mjesto prebivališta udaljeno više od 70 kilometara od mjesta organa državne službe u kojem vrši službenu dužnost ima pravo na naknadu troškova za odvojeni život od porodice u visini od 250 KM mjesečno (*izmjena 99/22*).

(2) Državni službenik i namještenik, čije je mjesto prebivališta udaljeno više od 70 kilometara od mjesta organa državne službe u kojem vrši službenu dužnost, ima pravo na naknadu troškova smještaja u mjestu rada u visini od 299 KM mjesečno (*izmjena 99/22*).

(3) Osobe iz stava (1) ovog člana, koje imaju osiguran službeni smještaj, ali za smještaj plaćaju nakna-

* Uredba je objavljena u “Službenim novinama FBiH”, broj 63/10 od 29. septembra 2010. godine, a stupila je na snagu 30. septembra 2010. godine. Izmjene i dopune Uredbe su objavljene u “Službenim novinama FBiH”, broj 22/11 od 27. aprila 2011. godine, stupile su na snagu 28. aprila 2011. godine, 66/11 od 12. oktobra 2011. godine, stupile su na snagu 13. oktobra 2011. godine, 51/12 od 13. juna 2012. godine, stupile su na snagu 14. juna 2012. godine, 99/22 od 14. decembra 2022. godine, stupile su na snagu 22. decembra 2022. godine, a primjenjuju se od 1. januara 2023. godine, 15/23 od 3. marta 2023. godine, stupile su na snagu 11. marta 2023. godine i 68/23 od 6. septembra 2023. godine, a stupile su na snagu 14. septembra 2023. godine. Radi lakšeg prepoznavanja šta je u izmjenama i dopunama Uredbe promijenjeno, tekst izmjena i dopuna štampan je masnim slovima u svim izmijenjenim članovima.

du za zakup stana, imaju pravo na naknadu troškova smještaja u visini od 149 KM mjesečno (*izmjena 99/22 i 15/23*).

(4) Za ostvarivanje prava iz st. (1) i (2) ovog člana, državni službenik i namještenik podnose zahtjev i daju izjavu da u mjestu rada nemaju u vlasništvu stambenu jedinicu (kuću ili stan). O zahtjevu rješenjem odlučuje rukovodilac organa državne službe (*izmjena 15/23*).

St. (5) i (6) brisani ("Službene novine FBiH", broj 15/23).

3. Naknada za slučaj teške invalidnosti ili teške bolesti

Član 5.

U slučaju nastanka teške invalidnosti ili teške bolesti državnog službenika i namještenika, ili člana njegove uže porodice, **isplaćuje mu se jednokratna novčana pomoć u visini određenoj zakonom** (*izmjena 66/11 i 51/12*).

Raniji stav 2. brisan ("Službene novine FBiH", broj 51/12).

Pod teškom bolešću iz stava 1. ovog člana, podrazumijevaju se slijedeće bolesti: akutna tuberkuloza, maligna oboljenja, endemska nefropatija, hirurška intervencija na srcu i mozgu, sve vrste degenerativnih oboljenja centralnog nervnog sustava, infarkt (srčani i moždani), oboljenje mišićnog sustava, paraliza i druge teške bolesti određene općim aktom Federalnog ministarstva zdravstva, kao i teške tjelesne povrede. Bolest, odnosno tjelesna povreda se dokazuje na osnovu **nalaza, ocjene i mišljenja Instituta za medicinsko vještačenje zdravstvenog stanja** (*izmjena 51/12 i 68/23*).

Pravo na jednokratnu novčanu pomoć iz stava 1. ovog člana, na osnovu teške invalidnosti ostvaruje se za utvrđeni stepen invalidnosti od najmanje 60%.

Raniji stav 5. brisan ("Službene novine FBiH", broj 51/12).

4. Naknada za prekovremeni rad, rad u neradne dane, noćni rad i rad u dane državnih praznika

Član 6.

Državnom službeniku i namješteniku osnovna plaća uvećat će se:

- a) za prekovremeni rad najmanje 50%,
- b) za rad u neradne dane najmanje 30%,
- c) za rad noću najmanje 35%,
- d) za rad u dane državnih praznika najmanje 50%.

Naknade odnosno uvećanja plaće iz stava 1. ovog člana ostvaruju se donošenjem rješenja u kome će biti precizno naznačeni vrsta poslova, period obavljanja poslova i broj izvršioca poslova.

5. Rješavanje o naknadama i drugim materijalnim pravima

Član 7.

Naknade i druga materijalna prava predviđena u odredbama čl. 3. do 6. ove uredbe, ostvaruju se donošenjem rješenja.

Rješenje iz stava 1. ovog člana, donosi rukovodilac federalnog organa uprave u kojem se državni službenik, odnosno namještenik nalazi u službi.

III - PRIJELAZNE I ZAVRŠNE ODREDBE

Član 8.

Danom stupanja na snagu ove uredbe, prestaje da važi Uredba o naknadama i drugim materijalnim pravima koja nemaju karakter plaće ("Službene novine Federacije BiH", br. 34/04, 56/04, 68/05, 33/06 i **75/07**) (*izmjena 51/12*).

Član 9.

Ova uredba stupa na snagu narednog dana od dana objavljivanja u "Službenim novinama Federacije BiH".